

Headlines

1. कैबिनेट ने "प्रधानमंत्री ग्रामीण सड़क योजना" दे त्रीए मरहले गी अगड़ा बधाया ऐ। कर्मचारियें ते पेंशनरें लेई DA ते DR च 2 फीसदी बाढ़े गी मंजूरी दिती ऐ।
2. उपराज्यपाल मनोज सिन्हा होरें नशा मुक्त जम्मू-कश्मीर अभियान तैहत राजौरी च पदयात्रा च हिस्सा लैता ते गलाया जे 5 दिन चले दे इस अभियान च 63एं तस्करें गी हिरासत च लैता गया ऐ।
3. मुख्मन्त्री उमर अब्दुल्ला होरें श्रीनगर थमां हज यात्रुएं दे पैहले जत्थें गी विदा कीता।
4. जम्मू डिविजन दे 5 जिलें च 60 दिनें लेई भारतीय नागरिक सुरक्षा संहिता दी धारा 163 लागू कीती गेई। जिला मैजिस्ट्रेटें नै सोशल मीडिया उप्पर अफवाहें ते नफरत फैलाने आहली समग्री उप्पर प्रतिबंध लाई दिता ऐ।
5. मौसम विभाग नै कल तगर जम्मू-कश्मीर दे केई इलाकें च मौसम दे बदलोखड़े रौहने ते गरज-चमक कन्नै हल्की बरखा पौने दी पेशनगोई कीती ऐ।



Cabinet Decisions (Byte)

केन्द्रीय मंत्रीमंडल नै प्रधानमंत्री नरेन्द्र मोदी हुंदी अध्यक्षता च पूरे मुल्ले च ग्रामीण सिड़क राबते गी तगड़ा करने दे लक्ष्य गी ध्यानै च रक्खियै प्रधानमंत्री ग्राम सड़क योजना दे त्रिए मरहले गी मार्च 2025 थमां मार्च 2028 तगर लागू रखने गी मंजूरी देई दिती ऐ। इक होर महत्वै आहले फैसले मंत्रीमंडल नै केन्द्री सरकार दे मुलाजमें लेई मंहगाई भत्ते दी बाद्दु किश्त ते पेंशनरें लेई मंहगाई राहत देने गी बी मंजूरी देई दिती ऐ। एह हुकम पैहली जनवरी 2026 थमां लागू होगा। इसले मंहगाई भत्ते दी दर 58 प्रतिशत ऐ ते एहदे च 2 प्रतिशत दा बाढ़ा कीता गया ऐ। संवाददाता सम्मेलन गी सम्बोधित करदे होई केन्द्री सूचना ते प्रसारण मंत्री अश्विनी वैष्णव होरें आखेआ.....(बाईट)



Budget Session (Byte)

संसद दे दौनें सदनें दी कार्यवाही अनमित्थे समें लेई स्थगित होने मगरा बजट इजलास जेड़ा 28 जनवरी गी शुरु होआ हा- समास होई गेआ ऐ। लोकसभा च इजलास दे समापन भाषण च अध्यक्ष ओम बिरला होरें दस्सेआ जे बजट सत्र दौरान 93 प्रतिशत कम्मकाज होआ। इस गित्तै सदन दियां 41 बैठकां लगियां। श्री बिरला होरें आखेआ जे सत्र दौरान 12 सरकारी बिल पेश कीते गे जिंदे चा- खजाना बिल 2026- दोआलिया ते संशोधन असमर्थया संहिता संशोधन बिल- जन विश्वास प्रावधान संशोधन बिल ते केन्द्री सशस्त्र पोलीस बल- आम प्रशासन बिल 2026 समेत 9 बिल पास कीते गे। इस मौके पर बोलदे होई स्पीकर ओम बिरला होरें दस्सेआ.....(बाईट)



LG –Rajouri Padyatra (Byte)

लैफ्टिनेंट गवर्नर मनोज सिन्हा होरें अज्ज नशीले दोआइए थमां जम्मू-कश्मीर गी मुक्त करने आली मुहिम तैहत हिस्सा लैता ते राजौरी च इक सार्वजनिक रैली गी सम्बोधित कीता। इस मौके पर बोलदे होई लैफ्टिनेंट गवर्नर होरें आखेआ जे बन्ने आहला जिला राजौरी बड़ा संवेदनशील ऐ ते इत्थे बन्ने पारा नशीले दोआइए दी तस्करी सखल्ले होई सकदी ऐ- पर असें इनें चुनौतियें कन्नै निबडने- नशीली दोआइए दे बपार आहले ढांचे गी खत्म करने ते समाज गी इस कबैत थमां मुक्त करने दा पक्का धेइयां कीते दा ऐ। उंनें अगगे दस्सेआ जे जम्मू-कश्मीर पोलीस नै पूरे जम्मू डिविजन च इत्त भेठा नकेल कस्सियै अपनियां कार्यवाहियां बधाई दितियां न। 11 थमां 15 अप्रैल तगर 45 FIRआं दाखिल कीतियां गेइयां। 63एं तस्करें गी हिरासत च लैता गया ते बड़ी मती मात्रा च नशीले पदार्थे गी जब्त कीता।

प्रशासन नै स्कूलें Pharmacyएं ते दोआइयें आलियें एजेसियें पर बी अपनी ताड़ बधाई दिती ऐ ते एह लगातार जारी रौहगा। उंनें अगगे आखेआ.....(बाईट):

एहदे शा पैहले लैफ्टिनेंट गवर्नर मनोज सिन्हा होरें शहीद ADDC डाक्टर राज कुमार थापा हुंदे मानै च ते हुंदी सुच्ची सम्हालै च राजौरी गी इक स्मारक- अजैबघर ते लाइब्रेरी समर्पित कीती। डाक्टर थापा होर ऑपरेशन सिंदूर दौरान पाकिस्तान आसेआ बिजन कुसै इश्तेयाल दे कीती गेदी गोलीबारी च शहीद होई गे हे।



House Demolished

नशीले पदार्थे दी तस्करी पर कीती गेदी इक बड्डी कारवाई च प्रशासन नै अज्ज शनिवारें जम्मू दे बेलीचराना इलाके च सुरक्षा दे सख्त प्रबंधें तैहत इक कथित नशा-तस्कर दे घरै गी ढाई दिता ऐ। साढे जिला संवाददाता नै रिपोर्ट दिती ऐ जे अधिकारिणें मुजब आरोपी इसलै जेलै च ऐ ते उन्नै एह जायदाद गैर कनूनी गतिविधिणें थमां हासल होए दे पैसे थमां बनाई दी ही। एह कार्यवाही इसलै चला'रदे नशामुक्त जम्मू-कश्मीर अभियान तैहत कीती गई ऐ। अधिकारिणें दस्सेया जे पिच्छले बरे इससै चाल्ली दिणें डेढ सौ इमारतें गी नशाना बनाया गेया हा ते नशे आला नैटवर्क खत्म करने लेई इस चाल्ली दियां सख्त कार्यवाइयां लगातार जारी रौहगंन। आकाशवाणी खबरें कन्नै गल्ल करदे होई तहसीलदार जम्मू परमदीप सिंह होरें आखेआ.....(बाईट)



CM -Hajj

मुख्यमंत्री उमर अब्दुल्ला होरें अज्ज श्रीनगर दे शेख-उल-आलम अंतराश्ट्रीय हवाई अड्डे शा हज 2026 दे पैहले जत्थें गी विदा कीता। उ'नें हज यात्रुणें गी सुरक्षत ते अध्यात्मक सफर दी शुभकामनां दिती ते उनें'गी जम्मू-कश्मीर दी शांति – विकास ते खुशहाली लेई दुआ करने दी गुजारिश बी कीती। मुख्यमंत्री होरें मुत्तलका अधिकारियें गी यात्रा दे हर गेड़ गी हज यात्रियें लेई सुचारु बवस्था ते सुविधाजनक बनाने दे निर्देश जारी कीते।



DMs Social Media Order

जम्मू-पुंछ-रियासी-डोडा ते रामबन जिले दे जिला मैजिस्ट्रेट अपने-अपने जिलें च सोशल मीडिय दे गलत इस्तमाल गी रोकने लेई भारतीय नागरिक सुरक्षा संहिता दी धारा 163 लागू करी दिती ऐ।



Poonch Mock Drill (Byte)

फायर एंड एम्पजेंसी विभाग नै आपदा प्रतिक्रिया बल दी सांझ-भ्याली कन्नै पुंछ स्थित राजा सुखदेव सिंह जिला अस्पताल च आपातकालीन तयारियें गी मजबूत करने लेई अज्ज इक माँक ड्रिल दा आयोजन कीता। एहदा मुख्क उद्देश्य अस्पताल दे कर्मचारियें गी अगग थमां सुरक्षा- निकासी प्रक्रियाणें ते बचाव सरबन्धी कम्में बारे सिखलाई देना हा। मैडिकल सुपरिटेण्डेंट डाक्टर शफीक अहमद चौधरी होरें गलाया जे इस अभ्यास दा मकसद कर्मचारियें गी कुसा बी आपात् स्थितियें कन्नै निबड़ने लेई तयार करना हा। उ'नें गलाया.....(बाईट)



Shoba Yatra

“भगवान परशुराम जयंति” ते “अक्षय तृतिया” दे उपलक्ष्य च अज्ज संजा जम्मू च इक विशाल शोभा यात्रा कड्डी गई। एह शोभा यात्रा पंजतीर्थी चौक ते जम्मू रेडियो स्टेशन थमां शुरु होई। एहदे इलावा कल बडुलै 11 बजे शा इक विशाल लंगर दा आयोजन बी पंजतीर्थी चौक ते जम्मू रेडियो स्टेशन च कीता गेदा ऐ। आयोजकें सब्बनें लोकें गी अपील कीती ऐ जे ओह इस विशाल लंगर च हिस्सा लैन ते भगवान परशुराम हुंदा आर्शिवाद लैन।



Weather (Byte)

मौसम विभाग ने 19 अप्रैल तगर मौसम दे बदलोखड़े रौहने ते कुसा-कुसा थाहर तेज हवा ते हल्की बरखा पोने दी पेशनगोई कीती ऐ। ऊआं 20 अप्रैल शा 24 अप्रैल तगर मौसम खुशक रौहग। अधिकारियें लोकें गी तेज अंधी-झक्खड़ ते ऐन-गडा पोने आहले थाहरें च सतर्क रौहने दी सलाह जारी कीती ऐ। एहदे बारे होर मती जानकारी कन्नै मौसम विभाग दे निदेशक मुख्तार अहमद.....(बाईट)

